

ՀՀ ՊԵՏԱԿԱՆ ԵԿԱՄՈՒՏՆԵՐԻ ԿՈՄԻՏԵԻ
ԻՐԱՎԱԲԱՆԱԿԱՆ ՎԱՐՉՈՒԹՅՈՒՆ

Ո Ր Ո Շ ՈՒ Մ թիվ - 232

ՎԱՐՉԱԿԱՆ ՏՈՒՅԺ ՆՇԱՆԱԿԵԼՈՒ ՄԱՍԻՆ

«11» օգոստոսի 2023թ.

ք. Երևան

Ես՝ ՀՀ պետական եկամուտների կոմիտեի իրավաբանական վարչության ղեկավարի ժամանակավոր պաշտոնակատար Նաիրա Ավանեսյանս, քննելով՝ Սենիկ Հովհաննեսի Թովմասյանի (անձնագրի համար՝ AR0517107, հասցե՝ ՀՀ, Շիրակի մարզ, քաղաք Գյումրի, Խ. Հայրիկ խճուղի, 1-ին թաղամաս, 33 շենք, 31 բնակարան) նկատմամբ հարուցված մաքսային կանոնների խախտման վերաբերյալ գործը,

Պ Ա Ր Զ Ե Ց Ի՝

2023 թվականի հունիսի 13-ին Այրում երկաթուղային կայարանում ՀՀ ՊԵԿ ՄԴՊ վարչության և ԱՄՎ Այրում-Ջիլիզա կետ բաժնի աշխատակիցների կողմից մաքսային տեսազննման և զննման է ենթարկվել Երևանից Թբիլիսի ուղևորվող գնացքը, որի թիվ 837 էլեկտրաքարշի հովացուցիչի խողովակաշարերից հայտնաբերվել է մաքսային հսկողությունից թաքցված 38 կգ ընդհանուր քաշով հագուստ:

Փաստի առթիվ էլեկտրաքարշի մեքենավար Սենիկ Հովհաննեսի Թովմասյանի նկատմամբ «Մաքսային կարգավորման մասին» ՀՀ օրենքի 313-րդ հոդվածի հատկանիշներով կազմվել է մաքսային կանոնների խախտման վերաբերյալ արձանագրություն:

Վարչական վարույթի իրականացման ընթացքում Սենիկ Հովհաննեսի Թովմասյանը բացատրություն է տվել այն մասին, որ սույն թվականի հունիսի 13-ին իր կողմից շահագործվող և իր պատասխանատվության տակ գտնվող թիվ 837 լոկոմոտիվը Այրում կայարան ժամանելուց հետո ենթարկվել է մաքսային ստուգման, որի արդյունքում լոկոմոտիվի հովացուցիչների խողովակաշարում հայտնաբերվել է հագուստ, որը դրված է եղել թվով 8 հատ տոպրակի մեջ: Տույրակներում առկա հագուստն իրեն չի պատկանում և տեղյակ չէ, թե այն որտեղից: Տվյալ լոկոմոտիվը ընդունել է Գյումրու լոկոմոտիվային դեպոյից և լոկոմոտիվի ամբողջ պատասխանատվությունն իր վրա է: Հագուստից տեղյակ չի, բայց պատասխանատու է առաջացած խախտման համար:

Վարչական վարույթում առկա տեսանյութի ուսումնասիրությունից պարզվել է, որ ապրանքները տեղադրված էին էլեկտրաքարշի հովացուցիչի խողովակաշարերում, ինչը ակնհայտ դժվարացրել է ապրանքների հայտնաբերումը:

Վարչական վարույթի ընթացքում 02.08.2023 թվականին հարցում է կատարվել ՀՀ ՊԵԿ Արևելյան մաքսատուն-վարչություն՝ ճշտելու 38 կգ ընդհանուր քաշով հագուստի մաքսային արժեքը, որին ի պատասխան հայտնվել է, որ մաքսային արժեքը 13.06.2023 թվականի դրությամբ կազմում է ընդհանուր՝ 984857 ՀՀ դրամ: Միաժամանակ հայտնվել է, որ խնդրո առարկա ապրանքների ներմուծման դեպքում կիրառելի չեն ոչ սակագնային կարգավորման միջոցներ:

ԵԱՏՄ մաքսային օրենսգրքի 2-րդ հոդվածի 1-ին մասի 25-րդ կետի համաձայն՝ «Միության մաքսային սահմանով ապրանքների անօրինական տեղափոխում» է համարվում ապրանքների տեղափոխումը Միության մաքսային սահմանով այն վայրերից դուրս, որոնցով, սույն Օրենսգրքի 10-րդ հոդվածին համապատասխան, պետք է կամ կարող է իրականացվել ապրանքների

տեղափոխում Միության մաքսային սահմանով, կամ այդ վայրերում գտնվող մաքսային մարմինների աշխատանքային ժամանակից դուրս, կամ մաքսային հսկողությունից թաքցնելու կամ ապրանքների ոչ հավաստի հայտարարագրման կամ չհայտարարագրման կամ ապրանքների վերաբերյալ ոչ հավաստի տեղեկություններ պարունակող փաստաթղթեր օգտագործելու միջոցով և (կամ) նույնականացման՝ կեղծ կամ այլ ապրանքներին վերաբերող միջոցներ օգտագործելու միջոցով:

«Մաքսային կարգավորման մասին» ՀՀ օրենքի 301-րդ հոդվածի 1-ին և 2-րդ մասերի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

«Մաքսային կարգավորման մասին» ՀՀ օրենքի 313-րդ հոդվածի համաձայն՝ Հայաստանի Հանրապետության մաքսային սահմանով ապրանքների տեղափոխումը՝ մաքսային հսկողությունից թաքցնելով, այսինքն՝ գաղտնարանների օգտագործմամբ, ապրանքների հայտնաբերումը դժվարացնող այլ եղանակներով կամ ապրանքներին այլ տեսք տալու միջոցով՝ հանցագործության հատկանիշների բացակայության դեպքում՝ առաջացնում է տուգանքի նշանակում՝ այդ ապրանքների մաքսային արժեքի հիսուն տոկոսի չափով, **բայց ոչ պակաս քան մեկ միլիոն դրամի չափով:**

«Մաքսային կարգավորման մասին» ՀՀ օրենքի 332-րդ հոդվածի 1-ին մասի համաձայն՝ մաքսային կանոնների խախտումների վերաբերյալ գործը քննվում է վարչական պատասխանատվության ենթարկվող անձի մասնակցությամբ կամ Վարչական իրավախախտումների վերաբերյալ ՀՀ օրենսգրքի 267-րդ հոդվածով սահմանված դեպքերում՝ տվյալ անձի բացակայությամբ, իսկ նույն հոդվածի 2-րդ մասի համաձայն՝ մաքսային կանոնների խախտումների վերաբերյալ գործը կարող է քննվել սույն հոդվածի 1-ին մասում նշված անձի բացակայության դեպքում, եթե անձը բացակայում է և հայտնի չէ նրա գտնվելու վայրը, կամ եթե նա գտնվում է Հայաստանի Հանրապետության սահմաններից դուրս:

Սենիկ Հովհաննեսի Թովմասյանը 2023 թվականի օգոստոսի 11-ին հրավիրվել է ՀՀ ՊԵԿ Իրավաբանական վարչություն՝ իր նկատմամբ «Մաքսային կարգավորման մասին» ՀՀ օրենքի 313-րդ հոդվածի հատկանիշներով սկսված վարչական գործի քննությանը մասնակցելու համար և միաժամանակ նախազգուշացվել, որ համաձայն «Մաքսային կարգավորման մասին» ՀՀ օրենքի 332-րդ հոդվածի՝ չներկայանալու դեպքում վարչական գործի քննությունը կիրականացվի իր բացակայությամբ:

Այսպիսով, նյութերով պարզվել է, որ 2023 թվականի հունիսի 13-ին մաքսային հսկողությունից թաքցնելով, այն է՝ էլեկտրաքարշի մեքենավար Սենիկ Հովհաննեսի Թովմասյանի կողմից շահագործվող և պատասխանատվության տակ գտնվող թիվ 837 էլեկտրաքարշի հովացուցիչի խողովակաշարներում, ՀՀ մաքսային սահմանով տեղափոխել է ընդհանուր 984857 ՀՀ դրամ մաքսային արժեքով (որի 50 տոկոսը կազմում է 492429 ՀՀ դրամ) 38 կգ ընդհանուր քաշով հագուստ, այսինքն՝ վերջինս թույլ է տվել «Մաքսային կարգավորման մասին» ՀՀ օրենքի 313-րդ հոդվածով նախատեսված մաքսային կանոնների խախտում, ինչը հիմնավորվում է մաքսային կանոնների խախտման վերաբերյալ կազմված արձանագրությամբ, 13.06.2023

թվականի մաքսային զննման ակտով, Արևելյան մաքսատուն-վարչության գրությամբ, Այրում երկաթուղային կայարանում արված տեսանյութով և Սենիկ Հովհաննեսի Թովմասյանի բացատրությամբ:

Հիմք ընդունելով «Մաքսային կարգավորման մասին» ՀՀ օրենքի 313-րդ, 334-րդ հոդվածները.

Ո Ր Ո Շ Ե Ց Ի՝

1. Սենիկ Հովհաննեսի Թովմասյանին ճանաչել զանցառու «Մաքսային կարգավորման մասին» ՀՀ օրենքի 313-րդ հոդվածով և նրան տուգանել 1000000 ՀՀ դրամի չափով:

2. Որոշման մասին հայտնել Ս. Թովմասյանին՝ պարզաբանելով, որ «Մաքսային կարգավորման մասին» ՀՀ օրենքի 334-րդ հոդվածի 2-րդ մասի համաձայն համաձայն՝ որոշումն ուժի մեջ է մտնում կայացման պահից: «Մաքսային կարգավորման մասին» ՀՀ օրենքի 334-րդ հոդվածի 4-րդ մասի համաձայն՝ որոշումը կարող է բողոքարկվել «Մաքսային ծառայության մասին» օրենքի 37-րդ հոդվածով սահմանված կարգով կամ դատական կարգով՝ երկու ամսվա ընթացքում:

ՀՀ պետական եկամուտների կոմիտեի իրավաբանական վարչություն

(ստորաբաժանման անվանումը)

ղեկավարի ժամանակավոր պաշտոնակատար՝ Նաիրա Ավանեսյան

(անուն, ազգանուն)


(ստորագրություն)

Որոշման օրինակը՝ 3 էջերի վրա ստացա.

(իրավախախտում կատարած անձի անունը, ազգանունը, հայրանունը կամ տվյալ անձի ներկայացուցչի անունը, ազգանունը, հայրանունը և լիազորությունը հաստատող փաստաթղթի տվյալները)

(ստորագրություն)

«__» _____
(որոշման օրինակի ստացման ամսաթիվը)

20__ թ.

Ծանոթություն. Սույն որոշմամբ նշանակված փուլով գումարը ենթակա է վճարման Կենտրոնական գանձապետարանի №900005024055 հաշվեհամարին 19 ծածկագրով:

Սույն որոշումն անբողոքարկելի դառնալուց հետո «Վարչարարության հիմունքների և վարչական վարույթի մասին» օրենքի 88-րդ հոդվածով սահմանված կարգով և ժամկետներում ուղարկվում է Հայաստանի Հանրապետության հարկադիր կարարումն ապահովող ծառայություն:

Եթե առկա են վերցված ապրանքներ, դրանք վերադարձվում են «Մաքսային կարգավորման մասին» ՀՀ օրենքի 335-րդ հոդվածով սահմանված կարգով և ժամկետներում: